

Testnan cu e grua nobo na Barcadera lo por tuma luga na November caba



ORANJESTAD (AAN): Director di Aruba Ports Authority (APA), Jossy Figaroa, den un entrevista diaranzon a splica cu e parti di e trabao pa cu desaroyo di e waf di container na Barcadera cu tabata cay bao di APA a keda cla for di fin di juli. APA entre otro a percura pa amplia e waf y haci trabao di escavacion.

E parti cu ta cay bao di e compania cu lo opera e waf, esta ASTEC, ta andando ainda. Tur cos ta programa pa keda cla pa e waf ta completamente operacional na februari 2016.

Algun detaye manera trabao di pone klinker y construccion di e edificionan pa ASTEC, aduana, polis, etc. falta ainda pa completa; esaki ta parti di e proyecto cu ta resorta bao di ASTEC tambe.

Figaroa a bisa cu actualmente ASTEC ta den proceso di arma e grua nobo y ta premira cu pa luna di november caba lo por haci algun test riba e waf di Barcadera. APA lo consulta cu ASTEC con nan lo por haci e testnan aki pa cual lo des-

via cierto barconan pa Barcadera.

A pensa inicialmente pa muda e grua di Playa pa Barcadera, pero e grua ey ta mas of menos 30 aña bieu y tin su limitacionnan. E grua nobo ta mucho mas grandi, cu mas capacidad y mas moderno cu e grua cu tin actualmente na Playa.

Figaroa a remarca cu e waf nobo tin luga pa tres barco y ta ofrece mas flexibilidad cu e waf anterior unda cu un barco so por a para. Ora cu tin barco cu ta transporta santo y piedra no lo por tin tres barco na mes momento den e waf, y lo rekeri bon coordinacion pa acomoda e barconan cu tin.

E director a splica cu e parti unda ta baha piedra y santo por trece poco molester pa e barconan di fruta, pero tin formanan pa limita e molester. Tin un area special pa baha e carga aki unda cu e companianan cu a laga import'e por busk'e. Un di e companianan aki, esta ATCO a laga instala un "conveyor belt" pa haci e trabao mas facil pa nan mes, pero APA no ta kere cu tur compania lo instala e ekipo aki y ta pensa cu kisas of nan lo por haci un "deal" cu ATCO pa uzo di conveyor belt of nan lo sigui transporta e materialnan manera semper nan a hacie.

El a comenta cu regularmente ministernan ta bishita e waf di Barcadera pa un "update" y wak e desaroyo di e proyecto.

